



La Quotidiana
 7000 Cuera
 081/ 250 48 00
<https://www.suedostschweiz.ch/laquoti...>

Medienart: Print
 Medientyp: Tages- und Wochenpresse
 Auflage: 3'917
 Erscheinungsweise: 5x wöchentlich

Seite: 5
 Fläche: 66'929 mm²

Auftrag: 3009371
 Themen-Nr.: 140.008

Referenz: 76206881
 Ausschnitt Seite: 1/3



Sper la tscheina deliziosa ei era la cumpignia stada el center dalla sera.

Ideal per star da cumpignia

Emprema «Cultura e culinaria» ella Casa Sentupada cun Emanuel Berni e Martin Capaul

DA SUSI ROTHMUND / FMR

■ Empriu da cuschinier ha Emanuel Berni da Val S. Pieder ella cuschina dalla claustra a Glion. Siu meister d'empredissadi ei Markus Niehaus staus. Il venderdis vargau ei Berni turnaus ella cuschina dalla claustra per cuschinar e puppergnar biebein 40 hosps dalla Casa Sentupada ch'ei vegni per s'entupar a caschun da «Cultura e culinaria». Igl onn vargau ha il giuven cuschinier Emanuel Berni da Val S. Pieder ediu il cudisch da cuschinar «Alpine Inspiration». L'entschatta pil cudisch ha el gia dau duront il temps

d'empredissadi, ei fuva ina part da sia lavur da profundaziun. El cudisch dat ei massa recepts cun ingredienzas dalla regiun, tut ei cavigliau e preparau bellezza, empau sco da picturar in maletg da maglias en da tuttas colurs. «Miu cudisch duei oravontut inspirar culs recepts, mo era cullas fotografias dallas spisas en lur fuormas e colurs», puntuescha il giuven ambizius. Siu anteriur schef e scolast Markus Niehaus ha il cudisch en tutta cass gia inspirau. Tenend enta maun il cudisch han el e la menadra dalla Casa Sentupada, Katarina Kohlman, numnadamain giu l'idea d'organisar ina gastaria sut il motto «Cultura e culinaria».



Il signun Martin Capaul, Emanuel Berni e siu meister d'emprendissadi Markus Niehaus han puppergnau ils hosps cun cultura e culinaria.

Spir ideas e motivaziun

Quei ei secapescha era stau el senn da Berni che planisescha da luvrar pli ditg e pli bia sur sesez. Sia finamira ei d'organisar eveniments culinaries, bugen era en cumbinaziun cun cultura: «Jeu less saver decider sez nua, cun cons hosps ed en tgei rama che las gastarias han liug.» Per tochen 20 personas detti el damogn persuls da cuschnar, per dapli duvrassi el agid. Perquei quenti el en general era da limitar il diember da hosps, aschia ch'el hagi era aunc peda da paterlar cun quels. Proximamein ei ina gastaria cun Berni planisada el casti da Rehanau. «Leu ein las localitads idealas e zun adattadas», selegra il giuven ch'ei spir ideas. Spir ideas e motivaus senza fin fuva el gia duront igl emprendissadi. «All'entschatta era el perfin surmotivau e bia memia sperts, el

curreva bunamein per la cuschna entuorn ed jeu hai stuiu frenar el empau», seregorda Niehaus cun in surrir.

Virus d'alp

Il cudisch da cuschnar da siu anteriur emprendist ha Niehaus schau plascher. Sco el conceda seigi el schon empauet loschs sin siu anteriur emprendist. Durent far beinvegni als hosps ella Casa Sentupada ha el puntuau che Berni hagi empriu tier el sulet la basa ed aschuntau riend ch'ei hagian midau las rollas: «Jeu hai mudergiau el duront treis onns, oz mudregia el mei.» Grazia al grond agid da Niehaus e dus ulteriurs gidonters han ils varga 40 hosps astgau guder il venderdis sera in menu da quater tratgas cun ingredienzas regiunalas e stagiunalas. Durent igl aperitiv han ils hosps saviu empernder d'enconuscher in l'auter e schar gustar il caschiel d'alp dil signun *Martin*

Capaul. Quel ha era procurau per la vart culturala e raquintau dalla veta sco signun sin l'Alp Stavel. Cul virus d'alp eis el vegnius infectaus gia da buob cu el mava ad alp culs geniturs. Era Capaul – ch'ei dil reminent portretaus el cudisch da cuschnar – ei staus ad alp cun dunna ed affons. Il plascher d'ir ad alp han era ils affons dalla famiglia Capaul artau. Aschia ha il signun caschau igl onn vargau ensemen cun sia feglia, in'jamna in ed ina l'auter. El ha era tradiu ch'el e sia dunna mondien uonn la davosa ga ad alp sin l'Alp Selva, suenter surprindi la feglia. El e sia dunna *Hedwig* vegnien probablaimein ad ir ad alp enzanua ch'ei detti buca gest tonta lavur.

Adina puspei giu peda da presentar las tschaveras e discuorer in mumenet culs hosps ha era Berni priu. Aschia ei quei stau ina biala sera cun ina tscheina da guder e buns discuors en simpatica cumpi-



gnia. Katarina Kohlman, la menadra dalla Casa Sentupada, ei fetg cuntenza cul success dall'emprema «Cultura e culinaria». Duas ga per onn dueigi quei event ussa star sil program ed oravontut era carmalar hosps dalla regiun ella Casa Sentupada.